

Naqqiut

**Siunnersuut UPA2026/91 08.03.2026 -meersoq taarserpaa
(Makku naqqiutigineqarput: Siunnersuummi tunngavilersuutit oqaaseqatigiivi
naqqissorineqarput.)**

Inatsisartut Suleriaasianni § 33 naapertorlugu aalajangiiffisassatut siunnersuut imaattoq matumuuna saqqummiuppara:

**Nunavut peqatigalugu pisortatigoortumik ataatsimoorussamik suleqatigiiffimmik
pilersitsinissamut Naalakkersuisut Inatsisartoqarfimmilu Siulersuisoqarfik Nunavummi
inatsisartunut naalakkersuisuinullu saaffiginnissuteqarnissaannik piumaffigeqqullugit
Inatsisartut aalajangigassaattut siunnersuut.**

(Inatsisartunut ilaasortaq Aki-Matilda Høegh-Dam, Naleraq)

Tunngavilersuutit:

Nunat allat, namminersorlutik inissisimasut inuiaallu allat oqaluttuarisaanerup ingerlanerani suleqatigiinnissamut arlalinnik aaqqissuussaqaalersimapput.

Assersuutigalugu Saamit suleqatigiiffitsik inatsisartuisa akornanni siunnersuisoqatigiivitut taagorpaat. Nunarput arlaatigut peqataaffigisaqarpoq, soorlu Nunat Avannarliit Siunnersuisoqatigiit, Nunat Avannarliit Killiit Siunnersuisoqatigiivi allallu.

Taakkulli siunnersuisooqatigiit suliniaqatigiillu aaqqissuussaapput nunasiaateqarsimasut aaqqissuuseriaasaat malillugu. Aaqqissuussinerit Nunat Avannarliit aamma Europamiit kingornussimasat. Taamaasillunilu uagut aaqqissuussinerit taakkununga naleqqussartuartaqarsimalluta, naak allat piorsarsimassusaannut tulluarsarneqarlutillu anguniagaat nunanu taakkunanut naleqqunerusut. Taakku anguniagaat uagut immitsinnut inorsilluta malinniartuarsimasagut.

Nunat allat aaqqissuussaanerat malillugu ingerlaniarsarinitsinni, arlaannik pissuteqarluta sanilitsinnut qaninnerpaamut, tassa kitaaniittumut Nunavummut, suleqatigiinnissamik pilersitsinnaasimangilagut.

Nunatta kitaanut qiviarnissarput piffissanngorpoq. Nunaqqativut, nunatsinni sanilerisatuarput, qiviartariaqarpavut. Nunavut 1999-imiilli nammineerluni

inatsisartoqarlunilu naalackersuisoqarpoq. Arlalitsigut assigiiffeqarpugut. Inuit kinguaaraatigut, immap nunallu angingaartut periarfissarpassuaqarfiusuneerpugut.

Nunalli taakku marluk akornanni naalackersuisut inatsisartuillu toqqaannartumik suleqatigiinnermut ataatsimiititaliaqanngillat, suleqatigiiffeqanngillat.

NGO-t naalagaaffiillu allat uagut nammineq demokratii tunngavigalugu aaqqissuussaannermik ataqqinninngitsut tatigiinnarsinnaanngilavut.

Asasakka Inatsiartoqatikka, nutaamik aallartitsiniarta.

Nammineq naalackersuisuvut inatsisartuvullu aqputigalugit ataqatigiinnerulerniarta.

Aalajangiinissamut siunnersuutip siunertarinngilaa suleqatigiiffigeriikkat peqataaffigiunnaarnissaat, akerlianilli naalackersuisut inatsisartullu toqqaannartumik attaveqatigiinnissaat. Kingusinnerusukkut qanoq pisoqassanersoq uagut, Inatsisartunut ilaasortat, Naalackersuisut innuttaasullu akornanni aalajangiivigineqassaaq.

Aalajangiissutissami siunertaasut Inoqatigut saaffigalugit aallartilluta, inatsisartut naalackersuisullu akornanni toqqaannarnerusumik attaveqatigiinnerulernissamut alloriarta.

Taamatut oqaaseqarlunga siunnersuut Inatsisartunut oqallisigisassanngortippara.

Pisortanut aningaasatigut allaffissornikkullu kingunerisassai:

Pisortanut aningaasatigut allaffissornikkullu kingunerisassai isumaliuutersornarput, kisianni naliginnaasumik minnerusumik aningaasartuutitaqassalluni.

Aalajangiiffigisassatut siunnersuutip piviusunngortinnissaanut naliginnaasumik angalanissamut aningaasartuuteqarsinnaavoq, aamma isumaqatigiissuteqarluni atsioqatigiinneq imaluunniit assigisaanik pisoqarsinnaalluni, tamanna AC-fuldmægtigimik aningaasartuuteqarnermit annikinnerussaaq nutserisitsinerit oqaatsit atorneqartut akornanniittut ilanngullugit sinaakkutit atuuttut iluanni suliarineqarsinnaammata.

Piviusunngortitsineq taama annertutigisumik inatsisartut akimorlugit suleqatigiissitaliornermi suullu toqqammaviussanersut isumaqataassutigineqaratarsinnaanersut uani aalajangiiffigisassatut siunnersuummi sinaakkutit avataanniipput.

Namminersortunut aningaasaatigut allaffissornikkullu kingunerisassai:

Soqanngilaq.



Innuttaasunut aningaasatigut allaffissornikkullu kingunerisassai:
Soqanngilaq.